



Adie Dogger – Griezi Doggter

Ych bi nit der Schorsch vum Haafebeggi zwai,
Nai, ych bi im Haafe Santihans dehai,
deerte duen ych an de Graanekettene ummerisse,
und deerte dien mir d Meeve uff Grind aabe schisse.

I dämm Haafe z schaffe isch aber kai Hoon,
Dä gits drumm scho lang, dä het Dradditioon,
1904 isch s erschte Kooleschiff uff Basel zugglet,
Und myni Kollege hänn bim Usslaade greftig bugglet.

Doch doo kunnt amene scheene Daag der Herr Vasella,
Uns sait uns unschiniert, as äär dä Haafe well ha,
Mir Dogger solle gfelligscht und agebligglig abhaue,
Är welli drumm do en Intelligänzcampus aane baue.

Ych find die Furzidee aifällig und abselut nit grisse,
Dämm het allwääg mee as ai Meeve ins Hirni gschisse.
Uns Dogger will dää Gäldsagg ins Glaibasel schigge,
Y dängg, so aim sotte mir emool der Kessel go fligge.

Är sait au logger zu mir, es siigi jo nit zem saage
Wie vuy! Myys und Ratte i dämm Haafe ummejaage,
Die wääde speeter aber nimme do ummespaziere,
Die wird är denne in syyne Labor wisseschaftlich setziere.

Do gigelet au no der Guy Morin umme Egge,
Dä Käscherli maint, do gheeri doch ums veregge,
E Spazierwäägli am Ryy entlang bis no Hiinige aane,
Är wurd drumm jetze scho an der Ereffnigsreed blaane

Doch do kunnt der L'Empereur et Président Sarkosy,
Und verbietet die Wandervoogelschtreppi entlang em Ryy,
Diese Chemin isch très gefäärlisch und du nit ganz gebache,
Là, würde doch tous les Gligg de Bâle iiri Marschiebig mache.

Au der Miraculix kunnt und schreit: «Halt, do nit baue, dasch fatal,
Do hets doch iberall alti Gnöche, dasch doch e keltisch Areal,
I ha doch genau do my Zauberdrangg entwigget und gsothe,
S Iberbaue vo mym Deerfli, isch doorum schträng verbotte.»

Der Vasella saitem: «Loos jetze zue my liebe Herr Kollegea,
Wäge dääne alte Kneche bruchsch di nit esoo uffzreega,
Ych will do miini aigene Zaubermitteli entwiggle und braue,
Und dyyini Drepfli sin iiberflissig, verschwind, kasch abhaue.

Ych loss mir doch nit vo somene Grufti miini Blään lo versaue,
Zlehtamänd will ych doo my Vasella Dänggmool baue,
Denn by dämm aimoolige Campus, das isch jo s Grasse,
Spiilt der Stutz kai Rolle, blääche diens d Grangekasse.

Dangg dääne iirem vyyle Stutz wo ych ka pfundig versaue,
Deerfe bi mir nur die dyrschte Arschidäggtte vo der Wält baue,
Dernoo dien die hälschte Kepf zu uns ins Santihans jette,
Do entwiggle die denn fir mii die neye Gopfweetablette.»

Unsere Santihanslemer Dogger nimmt die Gschicht ganz logger,
Der Abbruch vum Haafe hauten nit so schnäll aabem Hogger,
Nur ains dueten a dämm neye Campus hailoos steere,
As är wäge dääne fremde Heere, jetze no sotti Änglisch leere.